

Referencia para *Ni chigaca lu reunión* *Xhiña' Dios ne modo nabáninu*

3-9 DE AGOSTO

**CA TESORO ZEEDA LU BIBLIA | ÉXODO
13, 14**

«Laguzuhuaa dxiichi' ne laguuya' modo chigulá Jehová laatu»

w13 1/2 yaza 4

Moisés, ti hombre ni gupa fe

Zándaca qué liica niní' ique Moisés pa nuxhele' Dios nisadó' Xiñá' que para tiidicabe ra nabidxi. Peru gúnnabe zuni Dios xiixa para gapa laacabe, ne biyúbibe guni cré ca israelita que ni. Sicarí' gudxi Moisés laacabe: «Cadi guidxíbitu. Laguzuhuaa dxiichi' ne laguuya' modo chigulá Jíobá laatu yannadxí» (Éxodo 14:13). Ñee gunda gucanebe ca israelita que para jma gápaca' fe Jíobá la? Gunda, purti' Biblia na laabe ne ca israelita que «bini cre cabe Dios, nga runi gunda udi'di cabe Nisadó' Xiñá que, casi ñaca nidi'di cabe ra nabidxi» (Hebreos 11:29). Fe ni gupa Moisés que gucaneni laabe ne zaqueca gucaneni ca binni ni yenanda ejemplu stibe.

w18.09 yaza 26 párr. 13

Ti Dios ni napa stale poder ne ni riene binni

¹³ (Biinda' Éxodo 14:19-22). Guxuí' lunu nuunu lade ca israelita ni qué guidxela pa ladu che' purti' nanda ejércitu sti' faraón laanu ne ma' yendanu ruaa nisadó' Xiñá'. Peru ni málasi runi Dios xiixa para gacané laanu. Zá ni ze' delante de laanu que málasi gurisá ni ne bicueeza ni ejércitu sti' faraón para cadi ugaandaca' laanu. Nacahuidó' guca ra nuu ejércitu sti' faraón, peru ra nuu campamentu stinu que naya'ni' dxindxi purti' cuzaani' ti biaani' ni zeeda de Dios ni. Ni málasi bidú'yanu bisigaaná' Moisés lu nisadó' que, bizulú bindubi ti bi nadipa' ni zeeda ladu rindani gubidxa ne óraque bixhele ndaga ni ti neza ndaani' nisadó' que dede randa ridú'yanu sti ladu nisadó' que. Bizulú gu-

dídinu ndaani' nisadó' ri' pur orden, laanu ne familia stinu, ca mani' stinu ne restu de guidxi que. Ne ora bixhátañeenu ndaani' nisadó' que, qué nuxooñe' di' ñeenu purti' cadi nabeñe ni, nabídxixuxu ni ne zanda zanu casi ziuunu. Dede ca binni ni rizá nanene, randa ridí'dica' ndaani' neza que para chindaca' sti ladu nisaadó' que.

w09 15/3 yaza 7 párr. 2, 3

«Qué chigusiaandalu' Jíobá»

Laga cuyubi ca enemigu que ximodo sá' xcárruca' la? guirá' ca israelita que yendaca' sti uriá nisadó' que. De raqué bisigaaná' Moisés lu nisadó' que, ne bindaate' Jíobá nisa que lu guiácabe. Nabé zía' nisa ngue bilaate' luguiá' faraón ne ca soldadu sti' ne raqué gútica'. Nin tobi de laacabe qué nilá. ¡Zaqué nga biree Israel de esclavu! (Éxo. 14:26-28; Sal. 136: 13-15.)

Pur ni guca raqué nabé xadxí bidxibi ca binni ni nabeza gaxha de ra gúcani que (Éxo. 15:14-16). Gudi'di' si cuarenta iza, ti gunaa de Jericó ni lá' Rahab gúdxibe chupa hombre israelita ca diidxa' ri': «Nabé ma' cadxíbidu laatu [...]. Purti' ma' binadiágadu ximodo bicuiidxi' Jíobá nisaadó' Xiñá' que nezalutu dxi bireetu de Egipto» (Jos. 2:9, 10). Pa nin ca guidxi ca qué nusiaandaca' caní b'i'ni' Jíobá dxi bilá xquidxi la? jmápeca cadi naquiiñe' nusiaanda' ca israelita que caní b'i'nibe.

Guyúbinu ca perla ni ga'chi'

it-1 yaza 396

Neza

Maca de dxiqué, guyuu neza xilaga ne neza nabé' para chindácabe ca guidxi nahuiini' o naro'ba' ni nuu Palestina ne para gúnicabe negocio (Nú 20:17-19; 21:21, 22; 22:5, 21-23; Jos 2:22; Jue 21:19; 1Sa 6:9, 12; 13:17, 18; laaca

zanda gú'yalu' NEZA STI' REY.) Neza ni jma ri-
quiiñe' binni dxiqué nga neza ni ruzulú Egipto
ne ridi'di' neza ri' Gaza ne Asquelón, ca guidxi
ni nuu Filistea, ne ma' zigudiini buelta neza zé-
cabe Meguidó, ne ridi'di' neza ri' Hazor, ti guidxi
ni nuu ladu guia' nisadó' sti' Galilea ne rilúxeni
Damasco. Neca nachucu neza ni ridi'di' Filis-
tea ri' para chindácabe Tierra Prometida que,
guca Jehová nacha'hui' né ca israelita que ora
yené laacabe gadxé neza para cadí guniná ca
filisteu que laacabe (Éx 13:17).

it-1 yaza 894 párr. 5, 6
Éxodo

**¿Pa neza zándaca bixelex nisadó' Xiñá' que
para gunda gudi'di' ca israelita?**

Ora yendácabe Ezam, ra ruzulú desierto que,
gudxi Dios Moisés guibiguétacabe ne guzu-
huaacabe campamentu stícabe delante de
Pihahiro, guriá nisadó'. Para guni cré Faraón
cananíticabe (Éx 13:20; 14:1-3). Caadxi binni
ni nabé ruunda' naca' diidxa' hebreu ni guca
traducir laguibigueta' qué raca significar si ni
«guicaacabe gadxé neza», sínuque laaca rini'ni
guibiguétacabe. Laaca bizeetecabe ora yendá
ca israelita ladu guia' de golfo de Suez, bi-
diicabe buelta ne gudídicabe ladu oriente de
Jebel 'Ataqah, laani nga ti cadena de dani ni
nuu ruaa golfo que. Pa gueeda ca egipciu que
de ladu guia' ne sanándaca' ca israelita, cumu
stálecabe la? qué zanda di' guxoñelúcabe na-
gueenda purti' ma' nuu nisadó' que ne cuchii ni
neza stícabe.

Ndi' nga ni bi'ni' cré ca judíu de primé siglu d.J.
(laaca zanda gú'yalu' PIIHAHIROT). Peru ni jma
risaca nga bia'si pe' ni bizétenu ri' ne modo ru-
zeete' Biblia bizaaca ni, neca ma' gadxé ni ná
xcaadxi binni ruunda' Biblia (Éx 14:9-16). Pur
ca ni ma' bizétenu ri', zanda guininu cadí ga-
xha de ra biluxe golfo ni riaana ladu occidental
sti' nisadó' Xiñá' que nga bixelex nisadó' que pa-
caa ñanda niguiree ejércitu sti' Faraón lú ca
israelita sti' ladu nisadó' que (Éx 14:22, 23).

10-16 DE AGOSTO

**CA TESORO ZEEDA LU BIBLIA | ÉXODO
15, 16**

«Guidú'ndanu para gusisácanu Jehová»

w95 15/10 yaza 11 párr. 11

Xiñee caquiñe' guidxibinu Dios ni dxandí'

¹¹ Biiya' ca israelita modo binitilú Jehová ejér-
citu sti' Egipto ne bisisaca ndi' laabe ne binni
de guirá' ladu gunna tu labe (Josué 2:9, 10; 4:
23, 24). Bisaca lá Jehová jma que ca dios falsu
sti' Egipto, purti' qué ñanda nulaca' ca xpínni-
ca'. Ma' qué ñanda ñapa ca egipciu confianza
ca dios stica', nin binni, ne nin ejércitu sti'
Egipto (Salmo 146:3). Cadí guendaridxagayaa
nga gánnanu biinda' ca israelita que canción
ni rusihuinni ruisácaca' Jehová ne ridxibica'
laabe, purti' nácabe ti Dios ni napa poder ne
rulá xquidxi.

w95 15/10 yaza 11, 12 párr. 15, 16

Xiñee caquiñe' guidxibinu Dios ni dxandí'

¹⁵ Pa ñaca ñu'nu lade ca ni bilá que, laaca nu-
quinde laanu nidú'ndanu: «De lade guirá' dios,
¿tuu nga naca casi lii, Jehová? ¿Tuu nga naca
casi lii? Purti' lii nabé nayalu'. Lii nga naquiiñe'
guidxibicabe ne gú'ndacabe para gusisácaca-
be, lii ni runi stale milagru» (Éxodo 15:11).
Neca ma' gudi'di' stale iza, dede yanna rie-
tenaládxicabe canción ri'. Lu último libru sti'
Biblia, ruzeete' apóstol Juan de ti grupu de
xpinni Dios ni bibi: «Cayuundacabe canción sti'
Moisés, esclavu sti' Dios, ne canción sti' Den-
dxuhuiini». ¿Xi ná canción ri' ya'? «Naro'ba' ne
guendaridxagayaa guirá' ni rúnilu' Jehová Dios,
ni jma napa poder. Jneza ne dxandí' guirá' ca
neza stilu' Dios ni qué ziuu dxi gusaana de
gaca Rey. Jehová, ¿tu qué guidxibi lii ne gusi-
saca lalú ya'? Purti' lii si nga fiel» (Apocalipsis
15:2-4).

¹⁶ Yanna ri' laaca' nuu stale xpinni Dios ni ma'
naca libre, rudiicabe xquixe pe' laabe pur ca

cosa sicarú ni biza'be ne pur ca mandatu sti-be. Stale binni de guirá' guidxi ma' libre laaca', ma' bixéleca' de guidxilayú sti' Binidxaba', pur-ti' ma' nánnaca' jneza guirá' ca mandatu sti' Dios ne rúnica' ni ná cani. Guirá' iza, stale mil de binni ríree de ndaani' guidxilayú malu ri' ne riuuca' ndaani' xquidxi Jehová, ni naca nayá ne ra raca ni jneza. Ma' cadi candaa, zabani ca binni ri' ndaani' ti guidxilayú cubi ra zaca puru si ni jneza, guedané si Dios xiana sti' lu-guiá' religiún ni qué rusiidi' ni dxandí' ne luguiá' guidxilayú malu ri'.

it-2 yaza 445 párr. 2

Música

Ndaani' guidxi Israel guyuu caadxi grupu ni ruunda', nuu biaje ruunda' chupa grupu ti canción, ruunda' ti grupu ti estrofa primeru oracaru' ricabi stobi ca laacabe o primé ruunda' ti binni ne despué ricabi ti coro laabe. Rulu' ndí' nga ni ruzeete' Biblia casi "guicábicabe" (Éx 15:21; 1Sa 18:6, 7). Modo gucuá caadxi Salmo, casi Salmo 136, rusihuinnini nabé biindacabe sicarí' dxiqué. Laaca modo ri' nga biinda' ca coro ni guyuu tiempu bibani Nehemías para gudiica' xquixe pe' Jehová dxi guca inaugurar ca muru sti' Jerusalén (Ne 12:31, 38, 40-42; laaca zanda gú'yalu' CANCIÓN).

it-2 yaza 729

Profetisa

Miriam nga primé gunaa ni ruzeete' Biblia guca profetisa. Zándaca biquiíne' Dios laabe para gudiibe chupa chonna mensaje sti', zándaca lu canción nga guni'be ca mensaje ni zeeda de Dios (Éx 15:20, 21). Nga runi gudxi Miriam ne Aarón Moisés: «¿Ñee cadi laaca [huaní' Jehová] pur mediu de laadu la?» (Nú 12:2). Jehová pe' guní' pur mediu de profeta Miqueas laa biseenda' «Moisés, Aarón ne Mí-riam» saníruca' nezalú ca israelita dxi guleebe laaca' de Egipto (Miq 6:4). Neca gucuua Mí-riam ndaaya' de gudii mensaje ni zeeda de Dios, qué nini'né pe' Dios laabe casi guni'né bi-

zá'nabe Moisés, ne dxi guni'be mal de Moisés, nabé nadipa' modo guluu jneza Jehová laabe (Nú 12:1-15).

Guyúbinu ca perla ni ga'chi'

w11 1/9 yaza 14

¿Ñee nannu' ni la?

¿Xiñee biquiíne' Dios bere xunaxi para gudii ni gó ca israelita?

Bíree si guidxi Israel de Egipto, chupa biaje bi-dii Dios laacabe stale bere xunaxi para gócabé beela sti' (Éxodo 16:13; Números 11:31).

Cadi naro'ba' ca bere xunaxi ca, nasoocame bia' 18 centímetru ne nanaacame bia' 100 gramu. Reedacame de sti ladu, ráchecame neza Asia occidental ne Europa, tiempu nanda la? riécame Arabia ne ladu guía' de África. Para chindácame ca lugar ca, ridí'dicame nisadó' Mediterráneo ne península sti' Sinái.

Diccionario Manual Bíblico ná: «Jma nagueenda ripapa ca bere xunaxi ca ora zécame ladu cundubi bi, peru pa málasi gadxé ladu gundubi bi o idxágacame purti' ma' xadxí de zipápacame la? riábacame layú». Ante guni seguírcame viaje stícame, riaanacame layú para guizii-lá'dxicame ti dxi o chupa gubidxa, nga runi cadi nagana para guinaaze binni laacame. Ra bizulú siglu veinte, bitoo guidxi Egipto bia' chonna millón de bere xunaxi lu xcaadxi guidxi cada iza.

Guiropa' biaje gudó ca israelita bere xunaxi, bi-zaaca ni lu primavera. Neca para tiempu ri', zidi'dí' ca bere xunaxi ri' lu península sti' Sinái, bindubi Jehová ti bi nadipa' para chiné laacame neza ra nuu campamentu sti' ca israelita (Números 11:31).

w06 15/1 yaza 31

Ni rinabadiidxa' ca ni ruunda'

Bíree si ca israelita de esclavu Egipto, bizulú gudicheruaaca' purti' huaxié' guendaró ná-paca', ngue runi bidii Jehová laacabe maná

(Éxodo 12:17, 18; 16:1-5). Dxi que nga gu-dxi Moisés Aarón: «“Gucuaa ti jarru, bichá ti omer de maná ndaani’ ni ne bizuhuaa ni nezalú Jehová para guiaapa’ ni para guirá’ generación ni gueeda”. Ne casi gudxi Jehová Moisés, bizuhuaa’ Aarón ni nezalú Testimonio [zeeda gácani casi ti caja ra riaapa’ gui’chi’ risaca] para guiaapa’ ni» (Éxodo 16:33, 34). Dxandí, neca guluu Aarón maná que ndaani’ jarru ora gudxi Moisés laa, gupa xidé gulézabe dede ora bizá’ Moisés Arca que ne cu’ ca tabla de guié ra cá Ley que ndaani’ ni para guzuhuaabe ni nezalú Testimonio.

17-23 DE AGOSTO

CA TESORO ZEEDA LU BIBLIA | ÉXODO 17, 18

«Ca hombre ni naca humilde rusiidica’ ne rudiica’ dxiiña’ guni stobi»

w13 1/2 yaza 6

Moisés, ti hombre ni gunnaxhii

Laaca bisihuinni Moisés nadxii ca israelita. Ca binni de Israel gúnnaca’ biquiiñe’ Jiobá laabe para sanírube ládeca’, ngue runi guyécabe ra nuube ora gúpacabe guendanagana. Ne sica-rí’ na Biblia bí’nicabe: «Ca binni que [riiuca’] ra nuube siadó’ dede huadxí» (Éxodo 18:13-16). Bixui’lú zuhuaa Moisés guidubi dxi cucaadiaga ca binni que. Neca bidxágabe, peru bí’nibe ni purti’ gunnaxhiibe laaca’.

w03 1/11 yaza 6 párr. 2

Galán nga gápanu confianza tuuxa purti’ zacaneneni laanu chu’nu nayeche’

Ca hombre gulí Moisés ri’ maca bisihuinnica’ cualidad galán ante guicaaca’ xiixa dxiiña’ risaca. Maca bisihuinnicabe ridxíbicabe Dios, o runi adorárcabe laa jneza ne ridxíbicabe gucheenécabe laa. Rihuinni dxiichica rúnicabe stipa pur chinándacabe ca ley sti’ Dios. Cumu riuulá’dxicabe gúnicabe dxiiña’ jneza la? neca

gucuaacabe ti dxiiña’ risaca qué niquiiñecabe ni para nuquichinácabe binni. Gupa binni confianza laacabe peru qué niquiiñecabe ni para gucaacabe binni guni jma pur laacabe, ca xhamígucabe o ca familia stícabe.

w02 15/5 yaza 25 párr. 5

Ora ridxibi tuuxa Dios racané ni laa guni ni jneza

Guca Moisés humilde ne viene qué zanda guni guirá’ cosa stubi. Dxi bi’ya’ suégrube, Jetró, ma’ bidxágabe purti’ laasibe nuube guni chaahuibe ca guendanagana sti’ guidxi que gudxi laabe jma galán pa nibibe caadxi hombre ni zanda gacané laabe. Viene Moisés nuu cosa ni qué zanda guni laa si, ne gucuaabe conse-ju bidii Jetró laabe (Éxodo 18:17-26; Números 12:3). Ti binni ni nanna nuu cosa ni qué zanda guni stubi la? rudii lugar gacané stobi laa ne napa confianza zuni binni dxiiña’ ca jneza (Números 11:16, 17, 26-29). Ne riuula’dxi’ gacané stobi guiziidi’ (1 Timoteo 4:15). ¿Ñee cadi laa-ca ngaca nga naquiiñe’ gúninu la?

Guyúbinu ca perla ni ga’chi’

w16.09 yaza 6 párr. 14

Cadi gudi’nu lugar guiaba nanu

¹⁴ Dxi gudindené ca israelita que ca amalequita, gundisa’ Aarón ne Hur ná’ Moisés para gapa stipa. Laanu laaca zanda guyúbinu modo gudi’nu stipa xcaadxi binni ne cu’nu gana laaca’. Paraa zanda gúninu nga ya’. Ora gacanenu ca hermanu ni ma’ nagola, caní huará, caní rucaalú xfamilia laa, caní nuu stubi o guti tuuxa binni ni nadxii. Laaca zanda gacanenu caní nahuiini’ gapa stipa, purti’ gatigá rucaacabe laaca’ gúnica’ cosa malu o gácaca’ tuuxa lu Guidxilayú ri’ (1 Tesalonicenses 3:1-3; 5:11, 14). Guyúbinu modo guizaalá’dxinu de guidubi la-dxido’no xcaadxi hermanu ora ma’ nuunu ra Yoo sti’ Reinu, ora ma’ zigucheechenu diidxa’, ora ma’ cadó’nenu laaca’ gueta o guinínenu laaca’ pur teléfono.

it-1 yaza 416

Canon

Zanda guni crenu de Dios zeeda ca libru ni bicaa Moisés ne zanda chinanda ca ni runi adorar Dios ni cá luni. Cadi Moisés pe' biyubi gaca xaíque sti' ca israelita, purti' qué ninágabe nicaabe dxiiña' ri' (Éx 3:10, 11; 4:10-14). Sínuque Dios nga gulí laabe ne bidii laabe poder para gúnibe milagru, dede ca Sacerdote ni runi magia sti' Faraón guni'ca' de Dios zeeda guirá' ni rúnibe (Éx 4:1-9; 8:16-19). Cadi Moisés pe' biyubi guini' ne zalú stale binni ne gucaa caadxi de ca libru zeeda lu Biblia, sínuque Dios gudxi laabe gúnibe ni, ne biquiñe' espíritu santu sti' para gabi Moisés xi naquiiñe' guini', ne despué gucaa ni (Éx 17:14).

24-30 DE AGOSTO

CA TESORO ZEEDA LU BIBLIA | ÉXODO 19, 20

«¿Ñee racaneru' chii mandamientu ni gucuaa Moisés que laanu la?»

w89 15/11 yaza 6 párr. 1

¿Pabiá' risaca Chii mandamientu gucuaa Moisés para lii?

Tapa mandamientu ni cá primé que rusihuínnicani xi ribeza Jehová de laanu. **(Tobi)** Rinábabe laasibe gaca adorarbe (Mateo 4:10). **(Chupa)** Nin tobi de ca ni runi adorar laabe cadi naquiiñe' guni adorar bidó' (1 Juan 5:21). **(Chonna)** Iquiiñenu lá Dios jneza, né stale respetu (Juan 17:26; Romanos 10:13). **(Tapa)** Guirá' ni gúninu lu xquendanabáninu caquiiñe' gusihuínnicani cayúninu ni ná Jehová. Pa gúninu ndi' casi ñaca nicaanu dxi sábadu para niziiládxinu pur cayúninu ni jneza (Hebreos 4:9, 10).

w89 15/11 yaza 6 párr. 2, 3

¿Pabiá' risaca chii mandamientu gucuaa Moisés para lii?

(Gaayu') Dede yanna risaca nga guzuuba' xiiñi'

binni stiidxa' bixhoze ne jñaá para chu' familia stica' tobi si, ne gápaca' ndaaya' sti' Jehová. Ne galán ni zabeendunu pa gúninu ni ná mandatu ri'. Qué zabánisinu galán, sínuque laaca zabáninu «xadxi lu guidxilayú» (Efesios 6:1-3). Pa guni ca joven ni ná mandatu ri' lu ca último dxi sti' guidxilayú ri', zanda guibánicabe sin qué chu' dxi gáticabe (2 Timoteo 3:1; Juan 11:26).

Pa gannaxhiinu prójimo stinu qué zuninanu laa pur ca ni gúninu casi **(Xhoopa')** qué zuutinu, **(Gadxe)** qué ziú'nenu ni cadi xheelanu, **(Xhono)** qué zabánanu ne **(Ga')** qué zusiguiinu (1 Juan 3:10-12; Hebreos 13:4; Efesios 4:28; Mateo 5:37; Proverbios 6:16-19). Peru ¿xi rucaa laanu gúninu xiixa cosa ya'? **(Chii)** último mandamientu ri' nga cadi guicá íquenu gápanu jma, ne rusietenala'dxi' ni laanu nanna Jehová xi nuu ndaani' ladxido'no ne racaládxibe gúninu ni jneza (Proverbios 21:2).

Guyúbinu ca perla ni ga'chi'

it-2 yaza 893 párr. 6 hasta yaza 894 párr. 1
Sacerdote

Ca sacerdote xpinni Cristu. Gudxi Jehová ca israelita que pa guzuubaca' stiidxabe la? zeeda gácacabe «ti grupu de rey ni naca sacerdote ne ti guidxi nayá» (Éx 19:6). Zúniru' ca sacerdote ni za de Aarón dxiiña' ri' dede ora gueeda sti grupu de sacerdote ni jma risaca (Heb 8:4, 5). Zaluxe dxiiña' sti' ca sacerdote ni za de Aarón dxi guiluxe pactu sti' Ley ne dxi guzulú sti pactu nacubi (Heb 7:11-14; 8:6, 7, 13). Dxi-qué la? de guidxi Israel si nga gulí Jehová ca sacerdote ni chu' lu Reinu stibe. Peru despué laaca gulibe ca ni cadi naca judíu para gáca-ca' sacerdote (Hch 10:34, 35; 15:14; Ro 10:21).

Caadxi si de ca judíu que bi'ni' cré Cristu, ngue runi qué ñanda niree grupu de rey ni naca sacerdote ne ti guidxi nayá lade guidxi Israel (Ro 11:7, 20). Cumu ma' qué nuzuuba' guidxi Israel diidxa' la? gudxi Jehová profeta

Oseas gabi guidxi que: «Zanitolú xquidxe' purti' qué niná ñunibiá' naa. Cumu qué ninalu' ñunibia'lu' naa la? ma' qué zabiee' lii para gácalu' sacerdote stinne'. Ne cumu ma' bisiaandalu' ley ni bidii Dios stilu', naa laaca zusiaanda' ca xiiñilu'» (Os 4:6). Ngaca nga gudxi Jesús ca xaíque sti' ca judíu que: «Zaxha Dios laatu Reinu sti' ne zudiibe ni ti guidxi ni guni ni nabe» (Mt 21:43). Cumu yenánderu' Jesús Ley sti' Moisés dxi bibani lu Guidxilayú la? ngue runi ora bisiándabe ca hombre napa lepra que, gúdxibe laaca' checa' ra nuu sacerdote ne chineca' ofrenda ni cá lu Ley (Mt 8:4; Mr 1:44; Lu 17:14).

w04 15/3 yaza 27 párr. 1

Ca ni naquiiñe' gánnalu' de libru sti' Éxodo

20:5. ¿Ximodo nga redané Jehová «castigu luguiá' xiiñi' binni pur guendaruchee sti' bixhózeca'» ne luguiá' ca generación ni gueeda? Ora ma' huaniisi tuuxa ne nanna xi cayuni nga raza juzgar pur ca cosa ni runi. Peru dxi bi'ni' adorar guidxi Israel xcaadxi Dios, cadí laasicabe gucanácabe, sínuque laaca gucaná ca xiiñicabe. Dede né ca israelita ni bizuuba' diidxa', cumu bibánicabe lade ca israelita ni qué nuzuuba' diidxa' que la? guca nagana para laacabe cadí gucheenécabe Jehová.

31 DE AGOSTO HASTA 6 DE SEPTIEMBRE

**CA TESORO ZEEDA LU BIBLIA | ÉXODO
21, 22**

«Guidú'yanu guendanabani casi modo ruuya' Dios ni»

it-1 yaza 1028

Golpe

Zanda quiñe ti hebreu ti esclavu o esclava sti' né ti palu pa qué guzuuba' diidxa' o gucaalú laabe. Peru pa gueeda gati esclavu ri' ra cadíiñe la? naquiiñe' gaca castigar dueño stibe.

Peru pa tidi' chupa chonna gubidxa ne qué gátibe la? zusihuínnini neca gudiñe dueño stibe laabe peru cadí bi'ni' ni para guuti laabe. Dueño ri' napa derechu guni castigar laabe purti' laa guzi' laabe. Guiruti' qué zaná guuti esclavu sti' purti' casi ñaca nusa'bi' xpueltu o xiixa risaca sti'. Peru pa gati' esclavu que chupa chonna gubidxa despué, zaca nagana para gánnacabe pa gútibe pur ca golpe gudobe. Ne pa tidi' chupa chonna gubidxa ne nabániru' esclavu ri' la? ma' qué raza castigar dueño sti' (Éx 21:20, 21).

lv yaza 80 párr. 16

Ñee rusisácanu guendanabani casi rusisaca Dios ni la?

¹⁶ Dios nabé rusisaca xquendanabani binni ne zaqueca ca ba'duhuiini' ni ca'ru' gale. Ley ni gucuaa Moisés que bisihuinni ni xi naquiiñe' gaca binni ni guniná ti gunaa ni nacaxiiñi'. Ley que na pa gati' *gunaa* que *o xiiñibe* la? ziaba donda ique ni bininá laacabe que ne zuuticabe laa. Biblia na: «Ne pa tinde chupa hombre ne guninaca' ti gunaa nacaxiiñi' ne guni nga gale xiiñibe ante guizaa xpeeu' peru qué gati' tuuxa la? ni napa donda ca napa xidé quixe guirá' ni bi'ni' bia' na' xheela' gunaa ca; ne napa xidé quíxebe bia' na ca juez. Peru pa gueeda gati tobi de laacabe la? óraque napa xidé gudíilu' guendanabani pur guendanabani» (**Éxodo 21:22, 23**). Nga rusihuinni ximodo runi sentir Jibá ora gu'ya' guirá' iza gati' millón de ba'duhuiini' ni ca'ru' gale, stale biaje binnipe' rusaba laacabe purti' qué racalá'dxica' guchiiñacabe laaca' o para ganda gataneca' gadxé gadxé gunaa o gadxé gadxé hombre.

w10 15/4 yaza 29 párr. 4

Jibá racala'dxi' guibánu ne chu'nu nazaaca

Ley que laaca gudixhe xi gúnicabe pa málasi guíaaxha ti mani' luguiá' tuuxa. Pa gudxiga xcachu ti yuze tuuxa binni ne gueeda gati la? xpixuaana' yuze que naquiiñe' guuti laame para cadí guibigueta' gaca ngue. Ne qué zanda gobe nin gutoobe xpeelame, ne zaqué zuniti

hombre que xpueltu. Peru nuu tiru qué zati binni ni gudxiga xcachu yuze ca. Xi zazaaca pa qué gapa xpixuaaname laame ne gueeda guutime tuuxa ya'. Naquiiñe' gati yuze ca *ne xpixuaaname*. Nánnanu bicaa ca Ley que ca binni que chu'ca' cuidadu ca mani' stica' (Éxo. 21:28, 29).

Guyúbinu ca perla ni ga'chi'

w10 15/1 yaza 3, 4 párr. 4, 5

Xiñee naquiiñe' gudi'nu laanu Jibá

⁴ Ora gudii tuuxa laa Dios, cadi caní' si zuni xii-xa. Nga runi, cadi naquiiñe' gu'ya' binni ni casi guendariguite. Peru xi zabeendú binni pa gudii laa Dios. Para ganda guiénenu ni la? guini' íquenu primeru xi ribeendú binni ora gabi tuuxa laa zuni xiixa. Pa ti binni racala'dxi' gapa ti xhamigu la? primeru naquiiñe' quixhe ique cadi gusaana de guizaala'dxi' xhamigu. Modo guca xhamigu David ne Jonatán nga tobi de ca ejemplu sicarú ni rieete' lu Biblia. Laacabe guyuucabe tobi si dede bí'nicabe ti pactu (*bii-nda' 1 Samuel 17:57 ne 18:1, 3*). Yanna ri', ma' huaxié' si tu raca xhamigu casi laacabe ca. Peru cásica dxiqué, yanna ri' qué rusaana de gaca xhamigu chupa binni ora riguixhe íque-ca' qué gucheenésaaca' laaca' ne gacanésaaca' (Pro. 17:17; 18:24).

⁵ Ley ni bidii Dios guidxi Israel que laaca bisi-huinnini xi ribeendú ti mozo ora gudii stiidxa' qué zusaana xpixuaana'. Pa ti mozo racala'dxi' gaca sti' xpixuaana' laa ne qué chu' dxi gusaana laabe la? zanda guninebe laa ti pactu. Ley que na: «Pa mozo ca qué gusaana de guini': "Dxandipe' nadxiee' xpixuaana', xheela', ca xiiñe'; qué racala'dxe' guiaana' libre", óra-que naquiiñe' chiné xpixuaanabe laabe nezalú Dios ni dxandí' ne gucaa laabe ra puerta' o ruaa puerta' sti'; ne naquiiñe' quiide xpixuaanabe diágabe ne ti punzón, ne napa xidé gácabe mozo sti' xpixuaanabe bia' dxi guibánibe» (Éxo. 21:5, 6).

it-1 yaza 608, párr. 7

Cachu

Ca diidxa' ni zeeda lu Éxodo 21:14 zándaca ri-ni'ni dede ti sacerdote naquiiñe' gati' pa guuti tuuxa, ne qué zalá di' ti binni ni laa pe' biiti stobi neca pe' guinaaze cachu sti' altar que (bi-chaaga ni né 1Re 2:28-34).

